

Pembangunan Eka Heights dapat sambutan pembeli

SEREMBAN: Projek pembangunan terbaru syarikat pemaju perumahan dan hartanah, Matrix Concepts Holdings Bhd. (Matrix Concepts) iaitu Eka Heights di sini menerima sambutan menggalakkan pembeli sebaik sahaja ia dilancarkan hujung tahun lalu.

Ketua Pegawai Pemasaran Matrix Concepts, Lim Kok Yee berkata, pembangunan bercampur yang membabitkan 10 precinct itu telah berjaya menarik minat luar biasa pembeli khususnya di kawasan kediaman Eka 3 dan Eka 10.

“Eka 3 yang menampilkan 430 unit rumah bersambung (link) habis dijual seurus selepas pelancarannya pada bulan September 2023. Begitu juga, Eka 10, yang menawarkan 237 unit, mencapai jualan penuh hanya dalam satu hari semasa acara pengundiannya.

“Kami sangat teruja dengan sambutan yang luar biasa ini, kejayaan pembangunan kami selama hampir 20 tahun di Bandar Sri Sendayan telah

mewujudkan kepercayaan mendalam dalam masyarakat terhadap kami dan minat luar biasa pembeli terhadap Eka Heights ini adalah bukti komitmen kami terhadap kualiti dan inovasi,” katanya kepada pemberita pada acara Matrix Fiesta di Matrix Galleria, Eka Heights di sini semalam.

Sementara itu, Ketua Pegawai Eksekutif Matrix Concepts, Chai Keng Wai berkata, Eka Heights merupakan pilihan yang terbaik termasuk untuk pembeli rumah pertama bagi mendapatkan rumah impian mereka.

“Ia pilihan yang baik termasuk untuk pembeli rumah pertama malah ia juga berada di lokasi yang sangat baik dan terletak di tengah-tengah dan berhampiran iaitu bandar Seremban, Labu, Bandar Enstek dan Lapangan Terbang Antarabangsa Kuala Lumpur (KLIA),” katanya yang turut memberitahu pembangunan Eka Heights dijangka siap sepenuhnya antara tujuh hingga lapan tahun lagi.